

Problemanan Social den famia na Aruba ta grandi

ORANJESTAD(AAN) Desaroyo economico demasiado rapido a pone cu pueblo di Aruba durante ultimo 15 aña pasa den cambionan grandi cu a afecta drasticamente e bida familiar cu tur su consecuencianan negativo cu esaki a trece cune.

E cantidad di divorcio o matrimonionan fracasa ta espantoso y dia pa dia esaki ta aumentando y al final ta e muchanan cu ta keda pega entre mama y tata, ta esnan cu ta bira victima di un desaroyo cu nan no tin ningun influencia riba dje.

Leynan na Aruba cu mester duna proteccion na mayornan, no ta den bon balansa pasobra den practica e tata su derechonan no ta cos di gaba compara cu derechonan di e mama y riba dje e obligacionnan cu e tata mester cumpli cune den hopi caso si ta haya atencion di instancianan concerni cu ta cla pa tuma medida contra e tata na momento cu e no cumpli.

Un tata cu no cumpli cu pagamento di alimentatie por haya su mes confronta cu sancionnan pisa, siendo cu di otro banda hopi mama cu no ta cumpli cu derechonan di e tata pa e tata por wak su yiu o yiuonan frecuentemente, no ta worde sanciona manera mester ta.

"Caminda dos hende divorcia o bay for di otro, ta dos tin falta", esaki hopi biaha ta ser bisa, pero poco ta ser papia y comenta riba derechonan di tatanan di famia cu haya nan mes den divorcio.

No ta tur divorcio ta trece problemanan serio entre mama y tata, pero tin hopi caso caminda e hende homber ta haya su mes cu su lomba contra muraya pasobra e no

tin mucho caminda pa cana pa haya e mesun derechonan cu e mama si ta haya riba tanto yiu como otro facilidadnan cu e hende homber por bien lubida.

Den casi tur caso di divorcio ta e mama ta haya voogdij di e muchanan y e tata ta haya e obligacion pa cria su yiuonan door di paga alimentatie, pero mucho mas e tata no tin derecho riba dje.

Den ley ta poni cu e tata ta di dos Voogd, pero riba papel so esaki ta muestra masha bunita pasobra den practica esaki no tin balor.

Ta masha bunita cu ta stipula cu e tata tin derecho di wak su yiuonan un X cantidad di dia pa luna, pero den practica ta asina cu si e mama kier causa problema pa cu esaki, e tata ta haya su mes den un situacion cu e no por haci mucho cos y cu e mester djis guli manda abao con dificil esaki por ta.

Cuanto caso no tin na Aruba caminda e mama ta negligencia cuido di su yiuonan y e tata cu ta constata esaki por bien bay KZP (Polis) y otro instancianan, pero den poco caso e tata su peticionnan ta ser scucha y honra pa tuma medida contra mamanan cu ta negligencia nan yiuonan.

Den pasado DIARIO mes a yega di cubri casonan caminda mamanan tabata bay cu nan yiuonan chiquito den auto y laga esakinan pa nan cuenta dilanti di establecimentonan nocturno pa oranan largo y ora cu e tata a busca polis pa traha verbaal, asina mes e mama ta keda cu e muchanan pasobra ley ta duna e mama un proteccion

desigual riba e tata.

Cuanto tata no ta bay busca drechi di nan yiuonan y ta haya nan yiuonan sera den cas mientras cu mamay mes ta trip na grandi riba caya y riba dje despues ta yama polis pa entrega keho di molester contra tatanan cu no por a guli manda abao cu nan a haya nan yiuonan chiquito nan so sera den cas anochi?!

DIARIO ta hayando masha hopi carta di tatanan di famia cu no sa mas kico pa haci pa asina haya derecho pa nan por wak nan yiuonan y tambe cu nan por salvaguardia derecho di nan yiuonan.

Instancianan cu mester percura pa tanto mama y tata haya e mesun derechonan y obligacionnan, ta laga hopi di desea pasobra si nan tabata haci nan trabao manera debe ser, anto no tabata tin asina tanto caso di reclamo y di problema entre tatanan y mamanan cu ta pleita y bringa cu otro pa nan yiuonan.

Cuerpo Policial ta haya su mes confronta cu hopi caso di violencia caminda tatanan ta

perde cabez den discusionnan cu mamanan den casonan di divorcio y ta pa e muchanan semper e pleito ta cuminsa.

Violencia no por worde tolera na ningun momento, pero hecho ta cu hopi caso caminda hombernan a bira violento pa cu e derecho di por wak nan yiuonan ta pasobra nan ta sinti nan mes den un isolacion legal asina pisa, cu nan ta busca pa haya solucion den violencia cu ta haci cos bira peor ainda.

Parlamento di Aruba cu mester traha riba leyman igual pa cu derechonan di mayornan riba un base igual, te awe a faya den cumpli cu nan deber y obligacion nacional pa trece solucion pa tipo di casonan asina.

Hopi mandatario ta papia bla bla bla encunto hubentud ta riba mal caminda, pero nan mes no ta traha pa yega na leyman cu ta duna un mihor

proteccion pa muchanan y tambe leyman cu ta duna proteccion na mayornan cu ta busca tur forma pa salvaguardia derechonan y bienestar di nan yiuonan.

Mientras cu e desigualdad legal grandi ta keda entre derechonan di e tata y mama, dia pa dia ta mas problema so autoridadnan lo haya nan mes confronta cune.

Poco cos un tata por haci contra un mama cu ta actua y tuma decisionnan cu no ta na favor di muchanan, den caso cu mama y tata ta divorcia y e tata pa ley ta solamente di dos Voogd y esaki ta net nada y aki ta caminda e cambio grandi mester bin den forma di pone ambos mayor den e mesun posicion huridico cu instancianan concerni como e balansa legal di control mey mey di ambos partido.



Telefonnan di DIARIO
826747 - Fax 828551

PROTECCION CONTRA REDASHI!!

